

1647.

M. Arnault

TRADVCTION

D'VN ESCRIT INTITVLE'

*In Decretum Romane Inquisitionis,
de Autoritate Principum Aposto-
lorum Petri & Pauli,*

NOTATIONES,

M. DC. XLVII.

Case

F

39

THE NEWBERRY
LIBRARY

326

164732



REMARQUES

SVR VN DECRET DE L'INQUISITION DE ROME,

Touchant l'autorité des Princes des Apostres
SAINT PIERRE, & SAINT PAUL.

I.

LA premiere chose qu'il faut remarquer dans ce Decret est, que la proposition duliure de la Frequente Communion, *Que S. Pierre & S. Paul sont les deux Chefs de l'Eglise qui n'en font qu'un*, qui a esté le sujet de tant d'invectives & de declamations des Iesuites, non seulement n'y est pas condamnée, mais y est plustost approuvée: puisqu'on ne trouue à redire que dans l'explication qu'on pretend y auoir esté donnée en d'autres liures par ceux qui l'ont deffenduë. Car ce Decret ne condamne point ceux qui disent simplement, *Que S. Pierre & S. Paul sont les deux Chefs de l'Eglise qui n'en font qu'un*; mais seulement qui expliquent cette proposition en telle sorte, qu'ils mettent *une egalité en toutes manieres* entre ces deux Apostres, *Omnimodam aequalitatem*. Et ainsi il paroist; que tout ce que les Iesuites ont publié de viue voix & par écrit avec tant d'aigreur & tant d'excez contre cette proposition du Liure de la Frequente Communion, ne doit passer selon ce Decret que pour des effets de leur animosité, & de cette passion violente qu'ils ont tesmoignée en toute cette affaire.

II.

Si mesme on considere bien les termes dans lesquels on a conçu ce Decret, on trouuera qu'il ne touche pas proprement les Liures qui ont esté faits pour la deffense de cette proposition; parce qu'il ne cõdamne quel'explication qui establit entre ces deux Apostres *une egalité en toutes manieres*, *Omnimodam aequalitatem*. Et c'est si peu l'explication de ces Liures, qu'on y dit formellement le contraire, y ayant des Chapitres entiers qui ne font que représenter les aduantages de S. Pierre sur S. Paul dans l'egalité que les Peres leur attribuent, jusques à donner la préférence à S.

*Grandeur de
l'Eglise Ro-
maine, liu. 4.
ch. 24. & 25.*

4

Pierre sur S. Paul, comme à son ancien & à son aîné, auquel en cette qualité il devoit honneur & respect, selon S. Chrysostome. On y loustient mesme, que l'Eglise a esté principalement fondée sur S. Pierre; & que l'establissement de S. Paul presuppose celuy de S. Pierre; en sorte que S. Pierre luy eust pu dire ce que les Juifs pouvoient dire aux Gentils selon le mesme S. Paul: C'en est pas vous qui portez la racine, mais c'est la racine qui vous porte. Et enfin on reconnoist, que la puissance de S. Paul a esté extraordinaire, & extraordinairement establie, au lieu que celle de S. Pierre a esté simplement & absolument ordinaire. Qui sont toutes choses qui font voir qu'on n'a point estably une egalité en toutes manieres entre ces deux Princes des Apostres, puis que l'on y fait voir del'inegalité en toutes ces manieres.

III.

Aussi les Iesuites & leurs partisans ont si bien veu que cette explication n'est point celle des Liures contre lesquels ils ont formé tant de brigues & tant de cabales, que dans l'honneur qu'ils ont fait à ce Decret de le faire publier par le Gazetier, ils ont alteré la proposition, & en ont osté ces termes, *d'egalité en toutes manieres*; de peur qu'en France où l'on entend le François vn peu mieux qu'à Rome, on ne vist clairement qu'on auoit surpris l'Inquisition, en luy faisant condamner dans ces Liures ce qu'ils ne disent point.

IV.

Mais il n'estoit pas difficile de faire condamner vn Liure à des personnes qui ne l'auoient point lû, & qui même n'auoient pû le lire, estant escrit en vne langue qu'ils n'entendoient point. Car toute la doctrine dont il s'agit estant contenuë dans le Liure de la Grandeur de l'Eglise Romaine, qui est escrit en François, & l'Epiistre au Pape n'en contenant sommairement que quelques poincts, sans que les passages des Peres y soient rapportez tout au long & dans l'estenduë necessaire pour les bien entendre: il est certain que de tous ceux qui ont esté employez dans cette affaire, il n'y en auoit qu'un seul qui entendist le François, & à qui pour d'autres raisons cette connoissance ne seruoit de guerres. De sorte que pour proceder dans cette affaire selon l'ordre ancien del'Eglise, & particulièrement des Papes, il falloit commencer par la Traduction du Liure, pour rendre les Iuges capables de prononcer avec connoissance de cause, comme firent Messieurs les Euesques de France, auant que de proceder à la Censure des Liures des Iesuites d'Angleterre. Ce qui n'ayant point esté fait, on peut iuger par là de la facilité que les Iesuites ont eue de persuader aux Iuges tout ce qu'ils ont voulu en cette rencontre.

Et cecyleura esté d'autant plus aisé, qu'ils en ont esté eux-mesmes les parties, & les Iuges tout ensemble. Car sans parler du Cardinal Caraffe frere du General des Iesuites, & du Cardinal Lugo Iesuite, & que son voeu d'obeissance oblige encore maintenant de prendre conseil de son General dans toutes les affaires importantes, il se trouue qu'entre les Theologiens qui ont composé cette Censure, il y auoit deux Iesuites effectifs, & quatre ou cinq autres qui s'estoient declarez parties, ayant escrit contre la proposition dont il s'agissoit, & qu'on auoit choisis expres pour ce sujet, en ayant esloigné d'autres, quoy que tres-habiles, parce qu'on les auoit reconnaus plus disposez à se rendre à la verité.

VI.

Mais vne chose bien remarquable en toute cette affaire, est, qu'il y a enuiron deux ans qu'une Censure pareille ayant esté faite par l'ordre du Cardinal Spada, l'un des plus puissans dans l'Inquisition, elle fut iugée si insoutenable, qu'on se creust obligé de la supprimer, sans que les Iesuites mesmes en ayent pû iamais auoir copie: parce que les plus sages Ministres du Pape auoient fort bien veu, qu'elle ne pourroit estre que tres-defauantageuse au Saint Siege. Et cependant n'estant arriué autre chose depuis, sinon que cette doctrine a esté beaucoup plus appuyée de tous les tesmoignages de l'Antiquité dans le dernier Liure de la Grandeur de l'Eglise Romaine, & approuuée en suite, comme elle l'est encore aujourd'huy, par le consentement des plus habiles genstant de Paris que de Rome, cette reception fauorable n'a seruy qu'à irriter l'esprit du Cardinal Spada. De sorte que s'estant picqué d'honneur, il s'est joint avec les Iesuites pour faire reuiure cette premiere Censure qu'on auoit si iustement estouffée. Et vne marque visible de sa passion est, qu'elle l'a porté par le tesmoignage mesme de Diana dans son Liure, iusqu'à flestrir l'honneur d'un des plus grands ornemens du College des Cardinaux, sçauoir du Cardinal Contarin: ayant fait croire à cet excellent Casuiste, que le Traitté que ce sçauant Cardinal a fait pour establi la Primauté du Pape contre les Lutheriens, auoit esté reprouué par le Concile de Trente, parce qu'il ne pouuoit eluder autrement le passage formel par lequel il rend la Primauté de l'Eglise commune à saint Pierre & à saint Paul.

VII.

L'un des plus puissans moyens dont ce Cardinal & les Iesuites se sont seruis pour venir à bout de leurs desseins, a esté de faire croire au Pape & à ses Ministres par vne supposition tres-ini-

rieuse à la France, que ces liures n'auoient esté faits que pour preparer la voye à vn Schisme, & au dessein que la Cour auoir de faire vn autre Pape: que c'estoit vn reste des pretensions dufeu Cardinal de Richelieu: & que pour cette raison ces Liures auoient paru en mesme temps que nostre Armée en Italie, pour preparer les esprits à quelque changement notable dans l'Eglise: & qu'en tout cas, il falloit apprehender que les François qui sont aujourd'huy victorieux par toute l'Europe, n'eussent quelque dessein secret de broüillerie qui pourroit paroistre avec le temps. Et ainsi toute cette affaire a esté plus conduite par des raisons d'Estat & de Politique, que par des raisons de Theologie. Et il est estrange, que les Iesuites s'efforçans par toutes sortes d'inuentions de rendre odieux à la Cour de France ceux qu'ils presument Auteurs de ces Liures, taschent en mesme temps de les descrier dans la Cour de Rome, comme s'ils auoient de grandes intelligences dans la Cour de France au preiudice de l'Eglise.

VIII.

Après cela il ne faut pas s'estonner, si craignant d'estre plus éclaircis de cette affaire qu'ils n'eussent désiré, ils n'ont pas mesme voulu escoüter des Docteurs & des Theologiens de Paris qui sont à Rome, & qui se sont offerts de satisfaire à toutes les difficultés, & de répondre à toutes les objections qu'on pourroit faire sur cette matiere, & qui ont reiteré cette offre plusieurs fois, sans qu'on leur ait voulu donner seulement la moindre connoissance de tout ce qui se passoit: parce, disoit-on, que les loix de l'Inquisition ne le permettoient point, ayant accoustumé de iuger des affaires sans entendre les parties.

IX.

Il y a lieu de s'estonner, que les Iesuites veulent faire valoir icy ce Decret de l'Inquisition, après en auoir mesprisé de semblables tant de fois, & encore depuis peu dans des occasions importantes: Comme lors que la Censure qui condamna de Schisme & d'heresie le Liure du P. Rabardeau eust paru, ils en firent tant de cas, qu'ils ne craignirent point de dire & d'imprimer dans la Responce qu'ils firent à Messieurs de l'Vniuersité, que cette Censure venoit d'une puissance estrangere. Et lors que les Liures du P. Bauny furent censurés par la mesme Inquisition, ce Pere n'a pas craint de dire dans vn Imprimé qu'il a fait courir, & qui se voit encore, *Qu'a de commun la Censure de Rome avec la France?* Et lors que le Liure du P. Cellot, qu'on sçait auoir plus esté le Liure de la Société que d'un particulier, a esté condamné à Rome, non seulement ils n'y ont point deféré, mais au contraire, ils ont

honoré dauantage ce Iesuite, & l'ont mis aussi-tost Recteur à la Fleche. Mais ce n'est pas d'aujourd'huy qu'on voit qu'ils pretend obliger les autres de receuoir avec vne soumission absolue les Decrets & les Ordonnances dont ils se mocquent & se joient en tout ce qui les regarde, comme se reseruant à eux seuls le pouuoir de les mespriser.

X.

Cette consideration sera encore plus puissante, si l'on remarque trois choses. La 1. que ces Liures des Iesuites qui ont esté censurez par l'Inquisition sont pleins de maximes si scandaleuses, que ce n'a pas esté seulement l'Inquisition qui les a condamnerez, mais aussi les Euesques de France qui ont déclaré, qu'ils contenoient *une doctrine nouvelle, temeraire, fausse, pernicieuse, & seditieuse, tendante à diminuer l'autorité du Saint Siege, & à former des Schismes & des diuisions dans l'Eglise.* Et que ceux du P. Bauny en particulier portent les ames au libertinage & à la corruption des bonnes mœurs, & violent l'equité naturelle & le droit des gens. La 2. que les Iesuites ont tant de pouuoir à Rome par leurs caballes & leur faction (comme quelques Papes mesmes l'ont tres-bien reconnu, qui pour ce sujet ont eu dessein d'en esloigner leur General) que lors qu'on y condamne quelqu'un de leurs liures, il faut qu'il soit extraordinairement mauvais, & qu'il contienne des excez entierement insoutenables. La 3. qu'ils ne peuuent pas recuser le jugement de l'Inquisition, quel qu'il puisse estre, puis qu'ils se sont obligez par vn vœu particulier de receuoir avec vne obeissance au egle tout ce qui vient de la part de Rome. Mais nous voyons au contraire en cette rencontre, 1. que tous les sçauans non passionnez ont receu avec vn applaudissement merueilleux le Liure dont il s'agit, & l'on sçait que depuis ce Decret mesme qu'on a fait courir dans Paris, ils sont demeurez dans la mesme estime, & n'ont esté touchez que de douleur, de voir qu'on abusast ainsi de l'autorité du Saint Siege. 2. Que les Auteurs de ces Liures non seulement n'ont trouué aucun support à Rome, mais y ont esté traittez avec vne telle rigueur, par ce mesme credit & cette mesme faction des Iesuites, qu'on n'a pas seulement voulu entendre ceux qui se sont offerts de parler pour leur deffense, & qu'on a mesme condamné leurs Liures sans les auoir leus, qui est de toutes les nullitez la plus grande & la plus visible dans vn jugement. 3. Et enfin, que les mesmes Auteurs n'ayant aucune des obligations particulieres qu'ont les Iesuites, demeurent dans le droit commun de la France, où l'on sçait assez, que l'on ne reconnoist point l'Inquisition, en

8

forte que les Decrets qui en procedent n'y ont aucune force, comme les Theologiens mesmes nouveaux le reconnoissent. Non pas qu'on ne reuere en France aussi sincerement, & peut-estre plus qu'en aucun lieu du monde, l'autorité du Saint Sie-ge : mais parce que dans vne Iustice qui a des formes & des regles fort extraordinaires, & moins conformes au droit com-mun del'Eglise, on a quelque sujet d'apprehender, qu'il ne s'y glisse aysement des surprises, dont les Papes mesmes se sont plaints souuent, & que les personnes foibles, & qui n'ont nul credit en ce pays-là, n'y soient facilement opprimées par ceux qui y sont plus puissans.

XI.

Ce Decret mesme faisant voir, ainsi que nous auons desia dit, que la proposition de soy, & dans les termes qu'elle est couchée dans le Liure de la Frequente Communion est tres innocente: il est visible qu'on a esté obligé de la deffendre contre les accusa-tions atroces des Iesuites & de leurs partisans. Et comme on n'est entré dans cette dispute que par vne pure necessité, on n'a pu rien faire de plus conforme au deuoir de vrais Theologiens & de vrais Catholiques, que de représenter avec vne fidelité & vne sincerité toute entiere ce qui se trouue sur ce sujet dans les Pe-res, les Papes, & les Conciles. C'est tout ce qui est traité dans ces Liures, & on y declare en plusieurs endroits, qu'on ne se met en peine, que de rapporter fidellement les passages des Papes & des
Grandeur de l'Eglise Ro-
maine, liu. 1. chap. 1.
Pag. 77.
Plurimis ad-
duitis atque
congestis San-
Peres : afin que ceux qui ont quelque reuerence pour l'autorité la plus grande & la plus sainte qui soit dans l'Eglise, sçauoir pour les Papes, les Peres, & les Conciles, iugent s'il n'est pas plus raison-nable de deférer dauantage à leurs sentimens, qu'à ceux de nos Censeurs, qui s'attribuent aujord'huy la liberré non seulement de les reietter, mais aussi de les condamner comme des erreurs pern-icieuses. Enfin on proteste par tout, qu'on n'a dessein que de trai-ter vne question de fait en produisant simplement les paroles des Saints Peres, en sorte que l'Auteur de l'Epistre declare for-mellement à sa Sainteté, que si on prouue qu'il les ait falsifiées ou detournées de leur vray sens, il est prest de se condamner luy mesme, & conjure sa Sainteté de le condamner. Et ainsi il est manifeste, que la seule faute que ces Auteurs pouuoient auoir commise, estoit, d'auoir alteré le sens, ou les paroles des passa-ges qu'ils ont alleguez, & que si leurs Liures meritoient quelque censure, ce ne pouuoit estre qu'en ce point: sur lequel ce De-cret ne prononçant rien, encore qu'il fasse vne mention parti-culiere du grand nombre de passages qu'on a produits, il donne plustost

plustost lieu de croire qu'on a reconnu leur innocence, que non pas qu'on les ait iugez dignes d'estre condamnez.

XII.

On voit par là que la condamnation d'heresie qui est portée dans ce Decret de l'Inquisition ne pouuant tomber sur ces Liures (puis qu'on peut bien commettre vne fausseté, mais non pas vne heresie, en ne faisant que rapporter les sentimens & les paroles des autres) ne peut tomber que sur les Peres, qui sont si clairement les seuls Auteurs de toute la doctrine qui est contenuë dans ces Liures, qu'on n'a pas trouué lieu de condamner ceux qui les ont composez de leur auoir rien imposé. De sorte qu'il est extremement a craindre, que ce Decret ne cause vn grand trouble dans l'esprit des fideles, & vne grande joye dans ceux des ennemis de l'Eglise, en leur persuadant, qu'on n'a point apprehendé de condamner les Saints Peres & la Tradition ancienne dans vn point de certe importance: ce qui seroit ruiner tous les fondemens de la Religion Catholique.

XIII.

Cela paroist encore dauantage par les Theologiens qui ont esté des Iuges de cette affaire, & sur les Escrits desquels cette Censure a esté formée. Car ils ont tellement reconnu la force & l'euidence des passages alleguez dans ces Liures, qu'ils ont esté contraincts de prendre à partie les Auteurs de quelques vns, comme les sçauans & celebres Cardinaux de Cuza & Contarin, & par consequent les condamner d'heresie, les reconnoissant pour Auteurs de la doctrine qu'ils qualifient de cette sorte. Et ils ont esté contraincts d'eluder ceux des Peres & des Papes avec des deffaites si basses, si pueriles, & si esloignées du bon sens & de toute sorte d'apparence, qu'ils font mieux voir la force inuincible de la verité, que s'ils l'auoient reconnuë en termes expres.

XIV.

Pour en rapporter quelques exemples: Lors qu'on leur fait voir par vn grand nombre de tesmoignages formels des Peres & des Auteurs de tous les siecles, Que les Papes sont, & tiennent a grand honneur de s'appeller eux-mesmes les *Successeurs de Saint Paul*, comme de saint Pierre, ils ne craignent point de dire pour toute responce, *SucceSSIONE IMPROPRIA*, *Concedo: Successione propria ES perfecta, Nego* Quand on leur monstre, que saint Pierre & saint Paul sont vnus *in eundem loci primatu*, comme dit le Cardinal de S. George, neveu du Pape Boniface VIII, dont l'Ouurage a esté publié en Italie, & imprimé dans la Bibliothèque des Peres, ils pensent auoir obscurcy toute la lumie-

*Horū Patrum
Summorum
Pontificum
Sacrorū Con-
ciliorum, &
Doctōrum
locū.*

re d'un passage si formel en disant, *In primatu predicationis, Concedo: In primatu autoritatis, Nego*. Quand on leur fait voir que les Papes se disent également heritiers de ces deux Apostres, ils pensent auoir rencontré le mieux du monde, & pour vser de leurs termes si elegans *faciunt magnum festum* de cette distinction, *sunt heredes sancti Pauli in eminentia scientia, Concedo: in eminentia autoritatis, Nego*. De sorte que lors qu'il se trouuera vn Pape qui ne sera pas grand Theologien, il ne sera plus successeur de Saint Paul, mais seulement de Saint Pierre, & il ne pourra plus employer dans les Bulles l'autorité de ces deux Apostres que les Papes y employent tousiours, puis qu'il y en aural vn des deux à la succession duquel selon ces Escriuains il ne pourra plus rien pretendre. C'est vne chose honteuse que de vouloir eluder les paroles les plus claires des Papes par des distinctions si frivoles, qui ne peuuent seruir qu'à exposer à la risée des ennemis de l'Eglise l'autorité la plus sainte qui soit sur la terre.

X V.

Mais l'un des plus mauuais effets que ce Decret peut produire, c'est qu'il introduit vne confusion generale dans la doctrine de l'Antiquité. Car les personnes qui ne sont pas instruites dans ces matieres ne pourront-elles pas prendre aysement sujet de ce Decret de s'imaginer, que ce sera deormais vne heresie de dire avec Saint Irenée, Saint Epiphane & tant d'autres Peres & d'autres Papes, que ces deux Apostres ont esté ensemble Fondateurs & premiers Euesques de Rome, & par consequent, Chefs de toute l'Eglise: de dire avec saint Ambroise, que saint Paul n'est point inferieur à saint Pierre, & qu'il luy est égal: de dire avec saint Chrysostome & tant d'autres, que saint Paul a eu la primauté de l'Eglise: de dire avec le Pape Iean V I I I. que non seulement la science, selon la glose sans fondement de ces nouveaux Escriuains, mais que l'autorité de saint Paul, aussi bien que de saint Pierre vit encore dans le Siege Apostolique: de dire avec le Pape Innocent I I I. Que c'est en la personne de saint Pierre & de saint Paul (& non pas en celle de saint Pierre seul) que l'Eglise de Rome a receu l'autorité sur toutes les Eglises? Ne sera-t'il pas ayse de s'imaginer, que si les Liures qui ne contiennent que ces propositions des Papes & des Peres sont condamnez comme contenant vne doctrine heretique, ces propositions le sont aussi? Et on le croira d'autant plustost, que ceux mesmes qui ont esté du nombre des Commissaires escriuans contre cette doctrine combattent toutes ces propositions avec vne hardiesse estrange, comme si elles estoient des Auteurs particuliers de ces Liures,

Et non des Peres, dont on n'a fait que rapporter les propres paroles. Et cependant que peut-il y avoir de plus dangereuse consequence, que de donner ainsi la liberté à des particuliers de s'opposer avec tant d'assurance aux maximes les plus constantes des Papes & de toute l'Antiquité, & de les eluder par des distinctions imaginaires, exposant ainsi les fondemens de nostre Religion à la moquerie des impies & des athées?

XVI.

Et ainsi ce Decret ne peut servir qu'à obscurcir la gloire & affoiblir l'autorité du S. Siege, en jetant les Catholiques dans le trouble & dans l'incertitude, s'ils doivent plustost deferer à vne Ordonnance de l'Inquisition, qu'aux paroles formelles & expressées de tant de Papes & de tant de Conciles : ce qui seroit capable de rendre la conduite du S. Siege si odieuse, que les plus grands ennemis ne luy pourroient souhaiter vn plus grand mal. C'est ce qui a donné lieu à quelques-vns de dire desia, qu'il ne falloit plus trouver si estrange le bruit que les Iesuites font courir depuis quelque temps dans Paris, que le Liure de la Frequent Communion a esté censuré par l'Inquisition : puis qu'ayant desia censuré vne doctrine si avantageuse au S. Siege, & si clairement appuyée de tant de Papes, de tant de Peres, & de tant de Theologiens anciens & nouveaux, il n'y a plus de verité si claire & si asseurée, qu'on ne puisse flestrir en cette mesme maniere : & que si on a eu si peu de respect en cette occasion pour les plus grands Saints de l'Eglise, on peut bien n'en auoir pas dauantage pour les mesmes Saints, dans vn autre Liure qui ne propose que leur doctrine & leurs sentimens ; & qu'en suite ce grand nombre d'Euesques & de Docteurs de Sorbonne qui l'ont approuuée ne deuroient pas trouver estrange, qu'on ne les traitast pas plus fauorablement en cette rencontre, qu'on auroit fait les plus grands Euesques & les plus grands Docteurs de l'Eglise.

XVII.

L'honneur de la Sorbonne semble notablement interessé, par ce Decret, où l'on condamne d'heretique la doctrine des Liures qui ont esté publiez & leus dans Paris à sa veuë depuis tant de temps, sans qu'elle y ait trouué rien à redire. Car cela donne sujet de croire, ou que toute la Faculté de Paris ne se connoist pas si bien en heresies que Diana, de Bellis, & ces autres Theologiens, qui selon ce Decret ont formé cette Censure à Rome, ce que nous ne croyons pas qu'ils voulussent pretendre eux-mesmes, & la bassesse de leurs propres Escripts sur cette matiere n'est que trop

suffisante pour détromper ceux qui pourroient auoir cette opinion : ou bien que la Faculté de Paris connoissant clairement ces heresies, les dissimule & les approuue par son silence, & encore des heresies, qui, à ce que l'on prétend, vont à détruire l'autorité du S. Siege, ce qui seroit bleſſer encore plus defauantageusement vne Compagnie si illustre, & qui a tousiours paru si zelée pour la condamnation des erreurs & des heresies.

XVII.

Cela est d'autant plus considerable, que tout le monde ſçait, qu'aussi-tost que parut le premier Escrit qu'on a fait sur cette matiere, dans lequel elle auoit esté pluſtoſt propoſée qu'eclaircie avec l'estendue neceſſaire pour la bien eſtablir, les Iesuites eſmeurent vn trouble & vne tempeſte horrible contre cette proposition, s'efforçant d'irriter en meſme temps les puiffances de l'Eglise & de l'Eſtat, & publiant par tout qu'elle estoit heretique, & que la Faculté la cenſurerait à la premiere aſſemblée. Mais cette celebre Faculté a fait voir en cette occasion aussi bien qu'en tant d'autres, que ces bruits & ces tumultes que des personnes passionnées & qui ſont reſpandues par tout, excitent aſſez ſeulement, contre les veritez les plus conſtantes, ne ſont propres que pour ſurprendre les ſimples & les ignorans, & que le grand nombre de teſmoignages par leſquels on a iuſtifé la proposition qui estoit combattue d'une maniere si injuſte, estoit plus neceſſaire pour les particuliers que pour elle, qui connoiſſoit la verité dans elle meſme, & dans la ſource de la Tradition de l'Eglise. De ſorte que ſi elle n'a pû eſtre portée à la bleſſer le moins du monde, lors qu'elle ne paroiſſoit pas encore ſi claire à ceux du commun, & lors que ſes ennemis s'efforçoient de la rendre odieuſe à tout le monde par leurs artiſces ordinaires, elle a encore esté moins capable de luy faire tort depuis qu'elle a esté eclaircie & fortifiée ſi euidentement & ſi puiffamment dans les derniers Liures, que ceux meſmes à qui on auoit pû donner quelques impreſſions defauantageuſes contre le premier Escrit, ont esté entierement conuaincus, & ſe ſont rendus à la lumiere d'une doctrine ſi autorisée.

XIX.

Aussi les Iesuites voyant bien qu'ils ne pourroient tirer aucun aduantage dans la Faculté contre cette proposition, ils ont taſché d'exécuter à Rome ce qu'ils n'auoient pû faire dans Paris. Et pour pouoir mieux ſurprendre les Miniſtres du Pape, ils ſe ſont ſeruis d'un langage equiuoque & captieux, en leur diſant (ce qu'ils ont fait mettre encore depuis peu dans la Ga-

zette) que la Faculté n'auoit approuué, ny permis d'approuuer les Liures qui soustenoient l'égalité de S. Pierre & de S. Paul, pour leur persuader qu'elle auoit reiecté cette doctrine, & qu'elle auoit refusé la permission de l'approuuer. Au lieu qu'on sçait que la Faculté de Paris en corps n'a point accoustumé d'approuuer aucun Liure, & qu'elle ne donne iamais permission d'en approuuer si on ne la demande. Or en cette occasion on ne la point demandée, parce que l'Auteur n'a pas trouué à propos de se nommer, pour des raisons qui sont approuuées de toutes les personnes prudentes & iudicieuses, & on s'est contenté de l'approbation & de l'applaudissement avec lequel les plus habiles de la Faculté ont reçu cette proposition, sur tout depuis le dernier Liure, qui a acheué de leuer toutes les difficultés qui pouuoient former quelques nuages en cette matiere: De sorte que les plus considerables de ses aduersaires, & de qui on deuoit attendre de plus grands efforts contre cette heresie pretendue n'ont pû faire autre chose que de produire sept ou huit mois apres neuf ou dix Remarques qui ont esté aussi tost estouffées par vne Responce tres solide avec la satisfaction de tout le monde.

XX.

Mais l'honneur de tout le Clergé de France est encore plus interessé dans cette affaire que celuy de la Faculté, puis qu'ayant esté assemblé dans Paris plus d'un an, lors de la publication de cette doctrine, non seulement n'y a rien trouué à redire, mais l'a mesme autorisée par le consentement & par les louanges des plus eminens d'entre Messieurs les Prelats en suffisance & en doctrine, qui en ont mesme rendu tesmoignage deuant les premiers Ministres du Roy, & Monsieur le Nonce. Que si lors qu'il s'agit d'une doctrine nouuelle & beaucoup plus d'heresie, le seul silence des Euesques passé pour approbation selon les Canons & selon tous les Peres, combien leur seroit-il honteux d'y auoir encore adiousté leur estime & leurs eloges?

XXI.

Des personnes iudicieuses & affectuées au S. Siege, n'ont pû s'empescher de trouuer vn peu estrange, qu'on n'ait point veu les suites qui peuvent naistre de ce Decret de l'Inquisition. Car s'attribuant le pouuoir de iuger du droit de S. Paul à la dignité Pontificale, il semble qu'elle pretend auoir l'autorité de decider tous les differends qui pourront naistre à l'aduenir sur vne semblable matiere. Et qu'ainsi lors qu'il se rencontrera quelque difficulté sur l'election d'un Pape, ou sur les pretensions de ceux

qui disputeroient la Papauté, comme il s'est rencontré assez souvent : l'Inquisition sera leur iuge legitime, & toute la Chréstienté sera obligée de s'en tenir à son iugement : puis qu'elle aura desia prononcé dans vne occasion toute semblable, non sur le droit de quelques personnes ordinaires, mais sur celui de l'un des Fondateurs de l'Eglise Romaine, que tous les Papes reconnoissent pour leur predecesseur & pour leur Pere. Il est aisé de voir quelles peuvent estre les consequences de cette affaire, & dans quel trouble & quelle confusion elle pourroit à l'avenir engager le Saint Siege.

XXII.

Enfin on a quelque peine de comprendre comment on s'est pû tellement laisser aller aux déguisemens & aux vaines persuasions des Iesuites, que sur vne fausse imagination de servir le Pape on ait condamné comme contraire à son autorité la doctrine du monde qui luy est la plus aduantageuse. Car on a fait voir si clairement, combien il est important pour la grandeur de l'Eglise Romaine, de conseruer inuiolablement ce que toute la Tradition nous enseigne de l'vnité de S. Pierre & de S. Paul dans vne mesme charge : que ce principe estant estably, tous les efforts de ses ennemis tombent par terre, & que les principales difficultez qu'ils opposent à la gloire du Saint Siege se dissipent comme des nuages deuant le Soleil : Au lieu que cette verité estant ruinée, non seulement on renuerse l'autorité de S. Paul, mais par vne suite necessaire on esbranle d'une telle sorte celle de S. Pierre, qu'un habile homme ne scauroit plus entreprendre de la soustenir, s'il rencontre un aduersaire qui sçache se servir des aduantages que les partisans des Iesuites luy donnent, estant visible que toutes les euasions & les defaites dont on se sert pour obscurcir les passages clairs de l'Antiquité, qui donnent à S. Paul tous les mesmes titres qu'à S. Pierre, peuvent estre employez pour eluder ceux qui les donnent à S. Pierre, & par consequent rendent inutile presque tout ce qui se trouue dans les liures des anciens, pour soustenir la primauté du Saint Siege.

XXIII.

Ces Remarques estant desia faites, on s'est apperceu d'une fausseté insigne, que les Iesuites ont commise en faisant publier dans Paris ce Decret de l'Inquisition. Car ayant bien veu, qu'il ne touche point (comme nous auons desia remarqué) la proposition du Liure de la Frequente Communion, contre laquelle ils ont declamé d'une maniere si furieuse, & qu'ainsi il ne sert qu'à faire voir l'injustice & la violence de leur procedé; ils n'ont point

craint de le falsifier, en y mettant pour titre dans la Traduction qu'ils en ont faite, *Decret de nostre Tres-saint Pere le Pape Innocent X. par lequel cette proposition: S. Pierre & S. Paul sont deux Chefs de l'Eglise qui n'en font qu'un, est declarée heretique, & tous les Liures dans lesquels elle se trouue, sont deffendus.* Ce qui est vne imposture prodigieuse, & qu'on n'auroit iamais creu pou- uoir tomber dans l'esprit de personnes qui auroient encore le moindre reste d'honneur: puis qu'il paroist plus clair que le iour par la seule lecture de ce Decret, que cette proposition n'y est point condamnée absolument, & prise en elle-mesme, mais seulement prise en ce sens, qu'elle mette vne parfaite egalité entre S. Pierre & S. Paul, sans subordination ny dependance de S. Paul à S. Pierre dans la souveraine puissance & le gouvernement de l'Eglise universelle: & qu'il ne condamne point aussi les Liures dans lesquels cette proposition est contenue, comme ils osent dire par vn mensonge grossier, pour faire croire au peuple que le Liure de la Frequent Communion est condamné par ce Decret, mais seulement ceux dans lesquels cette proposition expliquée & condamnée au sens susallegué, est avancée & soutenue. On peut juger par là de ce que ces gens peuvent faire contre des personnes absentes & esloignées de trois cens lieux, & dans vn pais où leur caballe & leur faction est beaucoup plus puissante qu'en France, & avec quels artifices ils imposent à des Iuges qui n'entendent point la langue dans laquelle les Liures sont escrits, puis qu'ils ne craignent point dans Paris mesmes de se servir de falsifications si honteuses & si palpables pour opprimer la verité, dont ils ne se pouuoient declarer plus ouuertement les ennemis, qu'en la combattant par ces armes de mensonge.

XXIV.

Mais outre cette insigne fausseté, il y a encore vne chose bien nouvelle dans cette publication, qui est qu'elle se fait par l'autorité de Monsieur le Nonce, estant tout à fait inouï, que les Nonces ayent aucune Iurisdiction en France, ny droit d'y faire publier en leur nom aucuns Decrets; ce qui est vn acte de Iurisdiction, & vne entreprise sur le droit des Ordinaires. C'est pourquoy on a de la peine à croire, que cette nouveauté ait esté autorisée par vn Priuilege du Roy, celui qui est à la teste de cet Imprimé estant informe, & ne se trouuant point signé d'aucun Secretaire du Roy, comme ils le doiuent estre tous, ce qui luy oste toute creance.

F I N.

